

# ZAKON O UPOTREBI I ZAŠTITI NAZIVA BOSNE I HERCEGOVINE (Neslužbeni prečišćeni tekst<sup>1</sup>)

## Član 1.

Ovim zakonom uređuju se uslovi i način upotrebe i zaštite naziva Bosne i Hercegovine.

## Član 2.

*Sva pravna lica koja u svom nazivu žele upotrebljavati naziv Bosne i Hercegovine to pravo mogu ostvariti pod sljedećim uslovima:*

- 1. da svojim osnivačkim aktom, statutom i godišnjim planom aktivnosti i godišnjim finansijskim planom utvrđuju da će djelovati, odnosno obavljati svoje aktivnosti na teritoriji cijele Bosne i Hercegovine ili da se područje njihove djelatnosti, odnosno aktivnosti odnosi na teritoriju cijele Bosne i Hercegovine;*
- 2. da se kroz njihovu djelatnost, odnosno aktivnost, nedvosmisleno može utvrditi da će promovirati interese Bosne i Hercegovine, i na unutrašnjem i na međunarodnom planu;*
- 3. da unošenje naziva Bosne i Hercegovine u naziv pravnog lica nije u suprotnosti s interesima unutrašnjeg i međunarodnog pravnog poretka.*

## Član 2a.

*Sportski savezi (fudbalski, košarkaški i drugi) koji su do stupanja na snagu ovog zakona u svom nazivu upotrebljavali naziv Bosne i Hercegovine, a koji su registrirani u skladu s važećim propisima u Bosni i Hercegovini i bili međunarodno priznati, nastavit će upotrebljavati naziv Bosne i Hercegovine.*

*Ministarstvo pravde Bosne i Hercegovine će, u roku od 30 dana od dana stupanja na snagu ovog zakona, obavijestiti sve sportske saveze iz stava 1. ovog člana, upisane u odgovarajuće registre udruženja i fondacija, koji nisu dostavili dokaz o međunarodnom priznanju, odnosno članstvu u međunarodnim sportskim organizacijama, da ga dostave u roku od 60 dana od dana prijema obavještenja.*

---

<sup>1</sup> Ovaj neslužbeni prečišćeni tekst Zakona sadrži: Zakon o upotrebi i zaštiti naziva Bosne i Hercegovine ("Službeni glasnik BiH" broj 30/03); Zakon o izmjenama i dopunama Zakona o upotrebi i zaštiti naziva Bosne i Hercegovine ("Službeni glasnik BiH" broj 42/04) - označeno **podebljanim slovima**; Zakon o izmjenama i dopunama Zakona o upotrebi i zaštiti naziva Bosne i Hercegovine ("Službeni glasnik BiH" broj 50/08) - označeno *kosim slovima*; Zakon o dopuni Zakona o upotrebi i zaštiti naziva Bosne i Hercegovine ("Službeni glasnik BiH" broj 76/11) – označeno podvučenim slovima.

Ovaj neslužbeni prečišćeni tekst služi za internu upotrebu i na njega se ne može pozivati prilikom službene upotrebe.

### Član 3.

Za upotrebu naziva Bosne i Hercegovine potrebno je odobrenje.

### Član 4.

Zahtjev za upotrebu naziva Bosne i Hercegovine mogu podnijeti institucije, udruženja građana i druga pravna lica koja žele u svoj naziv unijeti naziv Bosne i Hercegovine.

Zahtjev za upotrebu naziva Bosne i Hercegovine podnosi se **Ministarstvo pravde i komunikacija** (u daljem tekstu: Ministarstvo).

### Član 5.

*Zahtjev za izdavanje odobrenja za upotrebu naziva Bosne i Hercegovine obavezno sadrži:*

- a) naziv podnosioca zahtjeva,*
- b) naziv koji se predlaže,*
- c) osnivački akt i statut,*
- d) godišnji plan aktivnosti i godišnji finansijski plan i*
- e) obrazloženje razloga za podnošenje zahtjeva.*

*Obrazloženje iz stava 1. tačka e) ovog člana treba da sadrži opis djelatnosti koje će se obavljati i način obavljanja djelatnosti i aktivnosti podnosioca zahtjeva na teritoriji cijele Bosne i Hercegovine, uz detaljno navođenje razloga o osnovanosti zahtjeva za odobrenje upotrebe naziva Bosne i Hercegovine u nazivu podnosioca zahtjeva.*

### Član 6.

Odobrenje za upotrebu naziva Bosne i Hercegovine daje Vijeće ministara Bosne i Hercegovine, na prijedlog Ministarstva.

Postupak za izdavanje odobrenja za upotrebu naziva Bosne i Hercegovine vodi se prema odredbama ovog zakona i Zakona o upravnom postupku ("Službeni glasnik BiH", br. 29/02, 12/04, 88/07 i 93/09).

Ako Ministarstvo u toku postupka utvrdi da zahtjev za izdavanje odobrenja za upotrebu naziva Bosne i Hercegovine sadrži formalni nedostatak koji sprečava postupanje po zahtjevu ili je zahtjev nerazumljiv ili nepotpun, te da podnosilac zahtjeva nije ispunio uslove propisane ovim zakonom, na to će pisanim podneskom upozoriti podnosioca zahtjeva, radi otklanjanja nepravilnosti i nedostataka.

Podnosiocu zahtjeva bit će omogućeno da ispravi ili dopuni zahtjev u roku 30 dana od dana prijema podneska.

Ako podnositelj zahtjeva otkloni nedostatke u roku iz stava 4. ovog člana, smatrat će se da je zahtjev od početka bio uredan. Ako podnositelj ne otkloni nedostatke u roku iz stava 4. ovog člana, pa se zbog toga ne može postupati po zahtjevu, smatrat će se da zahtjev nije ni podnesen, o čemu će Ministarstvo donijeti zaključak, protiv kojeg se može izjaviti posebna žalba u roku 15 dana od dana dostavljanja zaključka.

Protiv rješenja kojim se odbija zahtjev za upotrebu naziva Bosne i Hercegovine ne može se izjaviti žalba.

#### **Član 7.**

Izuzetno, nazivom Bosne i Hercegovine mogu se nazivati i dijelovi grada, odnosno općina, ulice, trgovi i slično.

Odobrenje za upotrebu naziva Bosne i Hercegovine iz prethodnog stava, a pod uslovima iz člana 2. tačka 2. ovog zakona, daje Vijeće ministara Bosne i Hercegovine shodno odredbama čl. 4. do 6. ovog zakona.

#### **Član 8.**

Niko ne smije upotrebljavati naziv Bosne i Hercegovine ako mu to po odredbama ovog zakona nije izričito dozvoljeno.

#### **Član 9.**

**Upotreba naziva Bosne i Hercegovine suprotno odredbama čl. 2.; 2.a.; 3.; 7. stav 2. i 8. ovog zakona predstavlja prekršaj za koji će se kazniti novčanom kaznom:**

- 1. u iznosu od 1.500 do 7.500 KM organ vlasti, privredno društvo ili drugo pravno lice,**
- 2. u iznosu od 300 do 750 KM odgovorna osoba u organu vlasti, privrednom društvu ili drugom pravnom licu,**
- 3. u iznosu od 300 do 750 KM osoba koja samostalno obavlja privrednu djelatnost i**
- 4. u iznosu od 100 do 400 KM fizičko lice.**

#### **Član 10.**

U roku od šest mjeseci po stupanju ovog zakona na snagu sve institucije, udruženja građana i druga pravna lica, čiji naziv sadrži i naziv Bosne i Hercegovine, moraju svoje nazive uskladiti s odredbama ovog zakona.

## Član 11.

Određbe ovog zakona ne odnose se na državne organe vlasti Bosne i Hercegovine i druge institucije i pravna lica koja su osnovana zakonom ili drugim aktom Parlamentarne skupštine Bosne i Hercegovine, Predsjedništva Bosne i Hercegovine ili Vijeća ministara Bosne i Hercegovine.

## Član 12.

Ovaj zakon stupa na snagu osmog dana od dana objavljivanja u "Službenom glasniku BiH", a objavit će se u službenim glasilima entiteta i Brčko Distrikta Bosne i Hercegovine.

\*\*\*

**("Službeni glasnik BiH" 42/04)**

## Član 4.

Ovaj zakon stupa na snagu osmog dana od dana objavljivanja u "Službenom glasniku BiH".

\*\*\*

*("Službeni glasnik BiH" 50/08)*

## Član 5.

*Ovaj zakon stupa na snagu osmog dana od dana objavljivanja u "Službenom glasniku BiH".*

\*\*\*

("Službeni glasnik BiH" 76/11)

## Član 2.

Ovaj zakon stupa na snagu osmog dana od dana objavljivanja u "Službenom glasniku BiH", a bit će objavljen u službenim glasilima entiteta i Brčko Distrikta BiH.